

七十二家集

王寧朔集卷之三

齊瑯琊王融元長著

明閩漳張爕紹和纂

啓

求自試啓

臣聞春庚秋蟀集候相悲露木風榮臨年共悅
夫惟動植且或有心况在生靈而能無感臣自
奉望宮闕沐浴恩私拔迹庸虛參名盛列纓劍
紫複趨步丹墀歲時歸來誇榮邑里然無勤而

官昔賢曾議不任而祿有識必譏臣所用慷慨
憤懣不遑自安誠以深恩鮮報聖主難逢蒲柳
先秋光陰不待貪及明時展悉愚効以酬陛下
不世之仁若微誠獲信短才見序文武吏法惟
所施用夫君道舍弘臣術無隱翁歸乃居中自
見克國曰莫若老臣竊景前脩敢蹈輕節以冒
不媒之鄙式罄奉公之誠抑又唐堯在上不參
二八管夷吾耻之臣亦耻之願陛下裁覽

法門頌啓

伏以迦文啓聖道冠百靈常住置言理高萬乘
神儀挺發非望雲就日所追睿識獨尊豈生明
弱言能企鹿苑金輪弘汲引以濟俗鶴林雙樹
顯究竟以開氓惜乎祇園滅影驚岳淪光微辭
旣遙大義如綴自不宜游十地擁接九區豈有
導覺水之塞源極法雲於落仞明公覽四諦之
必空悟三業之暫有應務屈已則仁兼旦奭隨
方申道則慧一淨名驅率土於福林入蒼黔於

王寧朔集

卷三

二

正術

謝勅賜御裘等啓

雲衣降授仙裾曲委榮振素里澤駭蓬心昔漢
帝解裘不獨前寵曹王褫帶復降今恩

謝勅賜米啓

臣無王陽之術計然之智不能負粟百里分地
一廛上虧溫養自取饑切豈悟外恩橫集天私
妄委

謝竟陵王示法制啓

翔慧燭於昏塗灑法水於塵路至夫澄心洗累
之規莊情束影之制解網出界之訓滅惑淨照
之旨固以行首霜威字端風厲信可以糟滓五
書糠粃百氏升罩眊周簪筭尼旦所謂窺七澤
而挾潢汙登太山而小天下

謝竟陵王示扇啓

竊以六翮風流五明氣重若比圓綃有兼玩賞
經綸雪羽潔竝霜文子淑賞其如規班姬儷之
明月豈直魏王九華漢臣百綺况復動製聖衷
垂言罔戒載慕聽眎式範樞機

謝竟陵王賜納裘啓

降飾自尊垂榮及賤玄玉不純曾波奪采南陸
方永北風日壯無衣無褐發念聖衷而挾纊之
問每流解裘之賜偏委

謝司徒賜紫鮮啓

東越水羞寔罄乘時之美南荆任土方揖鮮魚之最

謝武陵王賜弓啓

殿下摘藻蕙樓暢藝蘭苑敷積玉於風筵疊連
珠於月的兔園掩秀鄴水慚奇融揖讓未工濫
陪升飲之賞操弧反正繆奉招賢之錫文韜鏤
景逸幹捎雲玩溢百齡佩流千載

謝安陸王賜銀鉢啓

素金之貴有訪仙經鐫刻可奇見符神鼎撒膳
器於珍羞之席降寶玩於簞瓢之門

書

爲竟陵王與隱士劉虬書

玉燭登年金商在律炎涼始貿動靜惟安勤味
道腴幸遵雅尚豈不樂哉僕誠幸甚百姓一心
衆生不疾比屋可封將又何求但良書獨擁善
談無析願言之子實痗我心所以不遠千里尺
書道意自淳清旣辨澆漓代襲隱顯之術參差
默語之途紛互或飾智以警愚或激情以悟俗
或穢已以闇通或謬歌以明道屠羊駟馬未足

磷其堅佯狂如愚豈能緇其白官楚蕃魏人外
之氣逾邈入漢游梁區中之韻彌少及摧其輕
重品其得失則淵懷洞賞寧或符之僕夙養閒
襟長慕出槩迹塵珪組心逸江湖末面自親聞
風如舊而廻駕之念徒軫式問之禮無階固已
佇軸深衷傾筐遐路者矣君矯然獨遠確乎難
拔素志與白雲同悠高情與青松共爽宣習質
文緇林枯而重菴昭辨空有連河壅而復滔所
謂忘言之人可論天人之際豈能鳳舉鶴翻有

心儀萃高踰愛海比策禪衢沾濠射之冥游屈
祇鷲之法侶闡三乘於窮子發二諦於困蒙有
是因也何其暢歟今皇風具穆至道弘被四海
不溢五嶽無塵膠序肇脩經法敷廣人賤璣璣
家習禮讓樵蘇必時郊林全鬱量網有節鱗羽
偕翔至於層山絕澗還帶畿畎膏田沃野巨望
廡躋信可以招徃隱淪栖集勝寄故文舉築室
冶城之阿次宗植援西山之趾葛洪考槃於海
岫釋遠肥遁於鍾幽每踐其遺蹤輒深九原之

歎若高步可遷復何懷乎四子昔宣尼之見伯
雪師利之往維摩豈不知相忘之道哉諒有以
也未敘之間爲道自愛一二令凌琚之口具

序

三月三日曲水詩序

臣聞出豫爲象鈞天之樂張焉時乘旣位御氣
之駕翔焉是以得一奉宸逍遙襄城之域體元
則大悵望姑射之阿然睿眖寂寥其獨適者已
至如夏后兩龍載驅璿臺之上穆滿八駿如舞
瑤水之陰亦有饗云固不與萬民共也我大齊
之握機創曆誕命建家接禮貳宮考庸太室幽
明獻期雷風通饗昭華之珍旣徙延喜之玉攸

歸革宋受天保生萬國度邑靜鹿丘之歎遷鼎
息大垌之慙紹清和於帝猷聯顯懿於王表駿
發開其遠祥定爾固其洪業皇帝體膺上聖運
鍾下武冠五行之秀氣邁三代之英風昭章雲
漢暉飛日月牢籠天地彈壓山川設神理以景
俗敷文化以柔遠澤普汜而無私法含弘而不
殺猶且具明廢寢晨晷忘餐念負重於春冰懷
御奔於秋駕可謂巍巍弗與蕩蕩誰名秉靈圖
而非泰涉孟門其何險儲后睿哲在躬妙善居

質內積和順外發英華斧藻至德琢磨令範言
炳丹青道潤金璧出龍樓而問豎入虎闥而齒
胄愛敬盡於一人光耀究於四海若夫族茂麟
趾宗固磐石跨躡昌姬韜軼炎漢元宰比肩於
尚父中鉉繼踵乎周南分陝流勿翦之歡來仕
允克施之譽莫不如珪如璋令問令望朱芾斯
皇室家君王者也本枝之盛如此稽古之政如
彼用能免群生於湯火納百姓於休和草萊樂
業守屏稱事引鏡皆明目臨池無洗耳沈冥之

怨旣缺邁軸之疾已消興廉舉孝歲時於外府
署行議年日夕於中甸協律總章之司序倫正
俗崇文成均之職導德齊禮挈壺宣夜辨氣朔
於靈臺書笏珥彤紀言事於仙室褰帷斷裳危
冠空履之吏影搖武猛扛鼎揭旗之士勤恤民
隱糾逖王慝射集隼於高塘繳大風於長隧不
仁者遠惟道斯行讒莠茂閭攘爭掩息稀鳴桴
於砥路鞠茂草於園扉耆年闕市井之游稚齒
豐車馬之好宮隣昭泰荒憬清夷侮食來王左

言入侍離身反踵之君鬢首貫胸之長屈膝厥
角請受纓縈文鉞碧帑之琛奇幹善芳之賦純
牛露天之玩乘黃茲白之駟盈衍儲邸克狎郊
虞匪牘相尋鞮譯無曠一尉候於西東合車書
於南北暢轂埋麟麟之轍綏旌卷悠悠之旆四
方無拂五戎不距偃革辭軒銷金罷刃天瑞降
地符升澤馬來噐車出紫脫華朱英秀佞枝植
曆草滋雲潤星暉風揚月至江海呈象龜龍載
文方握河沈璧封山紀石邁三五而不追踐八

九之遙迹功旣成矣世旣貞矣信可以優游暇
豫作樂崇德者歟于時青島司開條風發歲粵
上斯已惟慕之春同律克和樹草自樂揆飲之
日在茲風舞之情咸蕩去肅表乎時訓行慶動
於天囑載懷平固乃瞻芳林芳林園者福地奧
區之渼丹陵若水之舊殷殷均乎姚澤臚臚尙
於周原狹豐邑之未宏陋譙居之猶褊求中和
而輕處揆景緯以裁基飛觀神行虛檐雲構離
房乍設層樓間起負朝陽而抗殿跨靈沼而浮

縈鉞交虹於綺疏
浸青泉於玉砌
幽幽叢薄秋
秩斯于曲拂
迢迢潏潏徑復新
萍泛汴華桐發
岫雜大采於柔莢
亂嚶聲於絲羽
禁軒承幸清
宮俟宴緹帷宿
置帘幕宵懸旣
而滅宿澄霞登
光辨色戒道執
爰展軫效駕徐
鑾警節明鐘暢
音七萃連鑣九
旂齊軌建旗拂
蜺揚葭振木魚
甲煙聚貝冑星
羅重英曲璫之
飾絕景追風之
駒昭灼甄部駟
駿函列虎視龍
超雷駭電逝轟
轟隱隱紛紛軫
軫羗難得而稱
計爾乃迴輿駐

罕嶽鎮淵停眸容有穆賓儀式序授几肆筵因
流波而成次蕙肴芳醴任激水而推移葆侑陳
階金匏在席戚奏翹舞簫動邠詩召鳴鳥於弁
州追伶倫於嶰谷發參差於王子傳妙靡於帝
江清歌有闕羽陽無箏上陳景福之賜下獻南
山之壽信飢饉之在藻知和樂於食華桑榆之
陰不居草露之滋方渥有詔曰今日嘉會咸可
賦詩凡四十有五人其辭云爾

王靈鰲集卷之四

齊琅琊王融元長著

明閩漳張爕紹和纂

頌

淨行頌三十一首

皇覺辨德篇頌

紫實昧朱狂斯濫哲舛逕揚鑣分源競柅麗景
或幽澄舒每缺水激波生湮深火滅情端徒總
理向空徹不有明心誰驅聖轍

開物歸信篇頌

生浮命外識罔情違榮雲結影慧日潛暉遙迤
脩道極夜無歸登山小魯泛海難沂參珉見璧
辨礫知璣迷其未遠匪正何依

滌除三業篇頌

樂出生滅患以身全衆資意造事假言筌利名
畢倚榮辱茲纏燕驥匪躡周錯徒鑄惑端風緒
愛境旌懸不勤一至何階四禪

脩理六根篇頌

傾都麗佳繞梁之曲肥馬輕裘意有芳醪晦黑
滋生昏闇競欲貌蕩魂浮身甘意觸靈龜攝根
睛葵衛是蟲草或虞人如不劫

生老病死篇頌

穠華易遷繁蕪不實星髮鮐肌鄰光惛日二豎
潛言十至空術生之往矣高松蕭瑟卽化翻靈
從緣墜質墮臍有譏嗟然何汨

尅責身心篇頌

瞻彼進德莫敢惑遑顧咨小智徒以太康豈無

通術跋此榛荒雖有重離迹照螢光循情內負
撫事外傷層羅一舉空念高翔

檢覆三槩篇頌

渾風緬沒旅俗膠加競文內疾誰覩心瑕再惟
情反三省身華貴危窮濫貧懾豪奢遭迴六蔽
紛綸七邪不圖厥始逸馬難罝

訶諍四大篇頌

迅矣百齡綿茲六入出沒昏疑興居愛習矻矻
予求營營爾給匪德日歸惟殃斯集貪人敗類

無厭自及昭回不希玄墟何泣

出家順善篇頌

澡身浴德晦迹埋名將安寶地誰留化城道場
曠謐禪逕閒清風飄弗響震轍徒驚嘯傲焉慮
脫落何營長捐有結永寘無生

在家從惡篇頌

石磨則磷玉生雖堅維居必徙豈曰能賢冰開
春日蘭敗秋年教隨類反習乃情遷命符三漏
生偕十纏茲焉遂在憂畏方延

沈寔地獄篇頌

冥津殊復曉高聽亦能卑陰牆雖兩密幽夜有
四知炎山翻烈火冰澗市寒澌羅城振雲幕鋒
樹鬱霜枝茹荼非云苦集木豈稱危求仁曾已
得長歎欲何爲

出家懷道篇頌

韞石諒非真飾甕信爲假竊服臯門上濫吹溜
軒下鳳祀徒驚心騶交終好野實相豈或照浮
榮未能捨迹殊冠冕客事襲驅馳者已矣歇鄭

聲無然亂周雅

在家懷善篇頌

處塵貴不染被褐重懷珠美玉曜幽石曾蘭挺
龍芻四氏不爲侶三界豈能淪諒茲親愛染寧
以財利拘煩流捨智寶榛路坦夷途萬物竟何
匹烈火樹紅芙

三界內苦篇頌

心怨動紛遶情怡輒遷互歡愛一離遠傷憂坐
衰暮連幌結清陰高臺起風露腐毒緣芳旨天

伐實脩嫜慾網必虧生繁且或全兔耿耿夜何
期悠悠終肯悟

出三界外樂篇頌

端襟測煩海矯步寫埃氛三受猶絕雨八苦若
浮雲輸心仰圓極罄質委方墳朝遊淨國侶暮
集靈山羣燈祇開遠照香宇薦嘉薰俛首睇人
俗信矣靜爲君

斷絕疑惑篇頌

生塗非一理識緒固饒津徒駭東陵富空嗟北

郭貧國生曾已戾顏氏信爲仁逢尤昭往業習
善會茲身勤憂永夷泰晏安終苦辛令名且云
重豈若樹良因

十種慚愧篇頌

神膏施惟重玄酒恩未隆明璣隋水上潤玉藍
田中稟天性所極資敬道攸崇羽毛共以勢輪
軌相爲通報德愴前雅酬言愛餘風遵途每多
外顧省能無忤

極大慚愧篇頌

冬狐理豐毳春蠶緒輕絲形骸翻爲阻心識還
自欺華容羈卅日生平少年時驅車追俠客酌
酒弄妖姬但念日前好安知身後悲惕然一以
愧永與情愛辭

善友獎勸篇頌

蘭室改蓬心梅崖變伊草丹青有必渝絲櫟豈
常皓曲轅且繩直詭木遂雕藻一簣或成山百
里倦中道隆漢乃王臣失楚信元保勉矣德不
振至言匪虛造

戒法攝心篇頌

金山嚴寶仞瓊峴烈瑤蕘牆狝譏不窟檐鷄豈
能棲淨花莊思序慧沼盥身倪六羣儻未一七
衆固恒齊端儀有直景正道無傾蹊維宮超以
悟襄野竟何述

自慶畢故止新篇頌

春非我春秋非秋一經長夜每悠悠陶形練氣
任元造啓蒙夷阻出重幽榮公三樂非爲曠箕
生五福豈能求靈姿妙境往難集微言至道此

云脩年逢生幸曾以慶盈愆貳過儻知憂畢故
斷新別苦海希賢庶等悲智流

大忍惡對篇頌

春山之下玉抵禽漢水之陽壁千金清榮神居
德非重潔已愚侶道已深愛憎喜怒生而習榮
華芳旨世所欽鴻才巨力萬夫敵誰肯制此方
寸心逸驥狂兕獷不御繁羈密柙儻能禁遣情
遺事復何想寂然無待恣幽尋

緣境無礙篇頌

恍象惚物終不名龍舉鸞集竟誰辯絕智亡身
孰爲礙韜名戢曜故能顯匪日匪月灼以懸安
飛安翔虛而踐壁石無間恣出沒水火有性任
舒卷敷教應俗驚泉流現迹依方迅風轉大哉
超世莫與羣希轅慕舜宜自勉

一志努力篇頌

像北二山尚有移河中一洲亦可爲精誠必至
霜塵下意氣所感金石離有子刺掌脩名立王
生擢髮美譽垂自來勤心少騫墜何不努力出

憂危勝幡法鼓縈且擊智師道衆紛以馳有常
無我儼旣列無明有縛孰能窺

禮舍利寶塔篇頌

越人鑄金誠有思魏后粧木亦云悲中賢小節
猶可戀去聖彌遠情彌茲祇樹蕭條多宿楚王
宮寂寞歟遺基設像居室若有望開儀駐景暖
如之連卿共日獨先後道悠命舛將無時傾懷
結想惻以慕垂靈寫照拂塵疑

敬重正法篇頌

出不自戶將何由行不以法欲焉脩之燕入楚
待駿足陵河越海寄輕舟仁言爲利壯已博聖
道弘濟邈難求通明洞燭煥曾景深凝廣潤湛
淵流翼善開賢敷教義照蒙啓惑滌煩憂功成
弗有名弗居淡然無執與化遊

奉養僧田篇頌

五玉已潤談而信八桂雖芳風乃掃妙理至言
唯聖寶不自伊人孰弘道照空觀法毗遷流撫
俗瞻光厭生老絕滅情嗜斷懽怡縱落豪華棄

雕藻親愛倏忽信風煙財利悠悠若塵草測以
龍雲豈曰高濯足江漢更慚皓

勸請增進篇頌

俟河之清逢聖朝靈智俯接一其遙白日馳光
不流照葵藿微志徒傾翹遍盈空有盡三界綿
塞宇宙罄八遼德光業遠升至覺寂寞常住獨
能超煎灼欲火思雲露沈汨使水望舟橋弘慈
廣度昔有誓法輪道御且徐驪

隨喜萬善篇頌

聞善若已燭良書見賢思齊笑通詰感幽動地
孝有誠殞首流腸忠爲操振禮擢文弘憲則機
謀颺勇靜姦暴明白入素志冲閑高論窮微契
神輿捐軀濟物不邀名輕財貴義豈期報百行
萬善紛塗軌求誠罄想畢歡路

廻向佛道篇頌

悠悠九土各異形擾擾四俗非一情驅車秣馬
徇世業市交鬻義街虛名三墨紛紜殊不會七
儒委鬱曾未弁吉凶拘忌廼數術取與離合實

縱橫朝日夕月竟何取投巖赴火空捐生咄嗟
失道爾廻駕沔彼流水趣東瀛

發願莊嚴篇頌

心所期兮彼之岸何事浮俗久淹迢照慧日兮
駕法雲騰危城兮出塵館芳珠燁兮聞歲時寶
樹颺兮警昏旦清露搏甘永以挹喜園流采常
爲玩無待殷鼎方丈羞安用秦箏織指彈勤誠
款願長不渝習苦塵勞從此捍

墓銘

豫章王墓銘

領袖傾淪人綱弛沒半嶽摧峰中河墜月眷然
曉隧如何夜臺鯨驟惋慕葆吹徘徊千秋萬祀
顧有餘哀

永嘉長公主墓銘

作儀阿媛取儷漢妃相金陋質穠李慚輝蕭穆
婦容靜恭女德顧史求箴披圖問則慶善郁夷
與仁冥默宵燧亡明曉挽已聲松門嚴澗泉帳
寒清悠哉白日鬱彼佳城

附錄

王融傳

梁蕭子顯

王融字元長琅邪臨沂人也祖僧達中書令曾
高並台輔僧達荅宋孝武云亡父亡祖司徒司
空父道琰廬陵內史母臨川太守謝惠宣女惇
敏婦人也教融書學融少而神明警惠博涉有
文才舉秀才晉安王南中郎板行參軍坐公事
免晉陵王司徒板法曹行參軍遷太子舍人融
以父官不通弱年便欲紹興家業啓世祖求自

試遷秘書丞從叔儉初有儀同之授融贈詩及書儉甚奇憚之笑謂人曰穰侯卽詎便可解尋遷丹陽丞中書郎虜使遣求書朝議欲不與融上疏世祖荅曰吾意不異卿今所啓比相見更委悉事竟不行永明末世祖欲比伐使毛惠秀畫漢武北伐圖使融掌其事融好功名因此上疏圖成上置琅邪城射堂壁上遊幸輒觀視焉九年上幸芳林園禊宴朝臣使融爲曲水詩序文藻富麗當世稱之上以融才辯十一年使兼

主客接虜使房景高宋弁弁是融年少問主客
年幾融曰五十之年久踰其半因問在朝聞主
客作曲水詩序景高又云在北聞主客此製勝
於顏延年實願一見融乃示之後日宋弁於瑤
池堂謂融曰昔觀相如封禪以知漢武之德今
覽王生詩序用見齊主之盛融曰皇家盛明豈
直比蹤漢武更慙鄙製無以遠匹相如上以虜
獻馬不稱使融問曰秦西冀北實多駿驥而魏
主所獻良馬乃駑駘之不若求名檢事殊爲未

孚將旦旦信誓有時而爽駟駟之牧不能復嗣
宋弁曰不容虛僞之名當是不習土地融曰周
穆馬跡徧於天下若騏驎之性因地而遷則造
父之策有時而躓弁曰王主客何爲殷勤於千
里融曰卿國旣異其優劣聊復相訪若千里日
至聖上當駕鼓車弁曰何意旣須必不能駕鼓
車也融曰買死馬之骨亦郭隗之故弁不能荅
融自恃人地三十內望爲公輔直中書省夜嘆
曰鄧禹笑人行逢大斡開喧湫不得進又歎曰

車前無八騶卒何得稱爲丈夫朝廷討雍州刺史王奧融復上疏會虜動竟陵王子良於東府募人板融寧朔將軍軍主融文辭辨捷尤善倉卒屬綴有所造作援筆可待子良特相友好情分殊常晚節大習騎馬才地旣華兼藉子良之勢傾意賓客勞問周款文武翕翕輻湊之招集江西僉楚數百人並有幹用世祖疾篤暫絕子良在殿內太孫未入融戎服絳衫於中書省閣口斷東宮仗不得進欲立子良上旣蘇太孫入

殿朝事委高宗融知子良不得立乃釋服還省
歎曰公誤我鬱林深忿疾融卽位十餘日收下
廷尉獄然後使中丞孔稚珪倚爲奏曰融姿性
剛險立身浮競動迹驚羣抗言異類近塞外微
塵苦求將領遂招納不逞扇誘荒僉狡弄聲勢
專行權利反覆唇齒之間傾動頰舌之內威福
自己無所忌憚誹謗朝政歷毀王公謂已才流
無所推下事曝遠近使融依源據荅詔於獄賜
死時年二十七臨死歎曰我若不爲百歲老母

當吐一言融意欲指斥帝在東宮時過失也融
被收朋友郗詵參問北寺相繼於道融請救於
子良子良憂懼不敢救融文集行於世

史臣曰晉世遷宅江表人無北歸之計英霸作
輔芟定中原彌見金德之不競也元嘉再略河
南師旅傾覆自此以來攻伐寢議雖有戰爭事
存保境王融生遇永明軍國寧息以文敏才華
不足進取經略心旨殷勤表奏若使宮車未晏
有事邊關融之報効或不易限夫經國體遠許



久爲難而立功立事信居物右其賈誼終軍之
流亞乎

贊曰元長穎脫拊翼將飛時來運徃身沒志違

王融傳

唐李延壽

融字元長少而神明警慧母臨川太守謝惠宣
女性敦敏教融書學博涉有文才從叔儉謂人
曰此兒至四十名位自然及祖舉秀才累遷太
子舍人以父宦不通弱年便欲紹興家業啓齊
武帝來自試遷祕書丞從叔儉初有儀同之授
贈儉詩及書儉甚奇之笑謂人曰穰侯印詎便
可解歷丹陽丞中書郎永明末武帝欲北侵使
毛惠秀畫漢武北伐圖融因此上疏開張北侵

之議圖成上置琅邪城射堂壁上游幸輒觀焉
九年芳林園禊宴使融爲曲水詩序當時稱之
上以融才辯使兼主客接魏使房景高宋弁弁
見融年少問主客年幾融曰五十之年久踰其
半景高又云在比閨主客曲水詩序勝延年實
願一見融乃示之後日宋弁於瑤池堂謂融曰
昔觀相如封禪以知漢武之德今覽王生詩序
用見齊主之盛融曰皇家盛明豈直比蹤漢武
更慙鄙製無以遠匹相如上以魏所送馬不稱

使融問之曰秦西冀北實多駿驥而魏之良馬
乃駑不若將旦旦信誓有時而爽駟駟之牧遂
不能嗣宋弁曰當是不習地土融曰周穆馬迹
徧於天下若騏驎之性因地而遷則造父之策
有時而躓弁曰王主客何爲勤勤於千里融曰
卿國旣異其優劣聊復相訪若千里斯至聖上
當駕鼓車弁曰向意旣須必不能駕鼓車也融
曰買死馬之骨亦以郭隗之故弁不能荅融躁
於名利自恃人地三十內望爲公輔初爲司徒

法曹詣王僧祐因遇沈昭略未相識昭略屢顧
盼謂主人曰是何年少融殊不平謂曰僕出於
扶桑入於暘谷照耀天下誰云不知而卿此問
昭略云不知許事且食蛤蜊融曰物以群分方
以類聚君長東隅居然應嗜此族其高自標置
如此及爲中書郎嘗撫案嘆曰爲爾寂寂邳禹
笑人行遇朱雀桁開路人填塞乃撻車壁曰車
中乃可無七尺車前豈可乏八騶及魏軍動竟
陵王子良於東府募人拔融寧朔將軍軍主融

文辭捷速有所造作援筆可待子良特相友好
晚節大習騎馬招集江西僉楚數百人並有幹
用融特爲謀主武帝病篤覽絕子良在殿內太
孫未入融戎服絳衫於中書省閤口斷東宮使
不得進欲矯詔立子良詔草已立上重蘇朝事
委西昌侯鸞梁武謂范雲曰左手據天下圖右
手扞其喉愚夫不爲主上大漸國家自有故事
道路籍籍將有非常之舉卿聞之乎雲不敢荅
俄而帝崩融乃處分以子良兵禁諸門西昌侯

聞急馳到雲龍門不得進乃曰有敕召我仍排
而入奉太孫登殿命左右扶出子良指麾音響
如鍾殿內無不從命融知不遠乃釋服還省歎
曰公誤我鬱林深怨融卽位十餘日收下廷尉
獄使中丞孔珪倚爲奏曰融姿性剛險立身浮
競動迹驚群抗言異類近塞外微塵苦求將領
遂招納不逞扇誘荒僉狡弄威聲專行權利反
覆唇齒之間傾動頰舌之內威福自己無所忌
憚誹謗朝政歷毀王公謂已才流無所推下事

暴遠近使融依源振荅融被收朋友部曲參問
此寺相繼於道請救於子良子良不敢救西昌
侯固爭不得詔於獄賜死時年二十七臨死歎
曰我若不爲百歲老母當吐一言融意欲指斥
帝在東宮時過失也先是太學生會稽魏準以
才學爲融所賞旣欲奉子良而準鼓成其事太
學生虞羲丘國賓竊相謂曰竟陵才弱王中書
無斷敗在眼中矣及融誅召準入舍人省詰問
遂懼而死舉體皆青時人以準膽破融文集行

於時

和王著作融八公山

齊謝朓

二別阻漢坻雙嶠望河澳茲嶺復嶢峴分區奠
淮服東限瑯瑯臺西距孟諸陸阡眠起雜樹檀
樂蔭脩竹日隱澗疑空雲聚岫如複出沒眺樓
雉遠近送春目戎州昔亂華素景淪伊穀貼危
賴宗袞微管寄明牧長蛇固能剪奔鯨自此睽
道峻芳塵流業遙年運倏平生仰令圖阡嗟命
不淑浩蕩別親知連翩戒征軸再遠館娃宮兩
去河陽谷風煙四時犯霜雨朝夜沐春秀良已

凋秋塲庶能築

傷王元長

梁沈約

元長秉奇調弱冠慕前蹤眷言懷祖武一簣望
成峰途艱行易跌命舛志難逢折風落迅羽流
恨蒲青松

遺事

王元長謂鍾嶸云宮商角二儀俱生自古詞人不知之惟顏憲子乃云律呂音調而其實大謬唯見范曄謝莊頗識之耳

詩品

永明八年天忽黃色照地衆莫能解司徒法曹

王融上金天頌

南史

王融俊爽識鑒過人敬異梁高祖每謂所親曰

宰制天下必在此人

梁本紀

豫章王薨勅王融爲銘云半嶽摧鋒中河墜月

帝流涕曰此正吾所欲言

南史

高麗俗服窮袴冠折風一梁謂之幘知讀五經
使人在京師王融戲之曰服之不衷身之災也
頭上定是何物曰此古弁之遺像也

王融圖古今雜體有六十四書少年倣效家藏
紙貴而風魚蟲鳥是七國時書元長皆作隸字
故移後來所詰湘東王遣沮陽令韋仲定爲九
十一種次功曹謝善勛增其九法合成百體其
中以八卦爲書爲一以太爲兩法徑丈一字方

寸干言

法書
要錄

子良旣亡陸慧曉於邸門逢袁象問之曰近者
云云定復何謂王融見殺而魏準破膽道路籍
藉又云竟陵不永天年有之乎答曰齊氏微弱
已數年矣斥牙柱石之臣都盡命之所餘政風
流名士耳不立長君無以鎮安四海王融雖爲
身計實安社稷恨其不能斷事以至於此道路
之談自爲虛說耳

南史

集評

元長士章並有盛才詞美英淨至於五言之作
幾乎尺有所短譬應變將畧非武侯所長未足
以貶卧龍

詩品

王元長辭不貴奇競須新事

詩品

王融作遊仙詩如金莖百尺仙掌銅盤集沆瀣
於中天倚清寒而獨矯也

竹林詩評

梁武帝集傳序

梁尚書左僕射臣沈約撰

文思安安欽明所以光宅日月光華南風所以
興詠日角之主出自諸生銳頂之君少明古學
漢高宋武雖闕章句歌大風以還蒲好清談於
暮年夫成天地之大功膺樂推之寶運未或不
文武兼資能事斯畢者也我皇誕繼自天生知
在御清明內發疏通外典爰始貴遊篇志經術
究淹中之雅旨盡曲臺之奧義莫不因流極源

披條振藻若前疑往滯舊學罕通而超然直詣
妙援終古善發談端精於持論置壘難踰摧鋒
莫擬有同成誦無假含毫興絕節於高唱振清
辭於蘭畹至於春風秋月送別望歸皇王高宴
心期促賞莫不超挺睿興濬發神衷及登庸歷
試辭翰繁蔚牋記風動表議雲飛彫蟲小藝無
累大道懷君人之大德有事君之小心爲下奉
上形於辭旨雖密奏忠規遺稟必削而國謨藩
政存者猶多逮乎俯應歸運仰脩乾錄載筆握

簡各有司存如綸之旨時或染翰暨於設簾靈
囿愷樂在鎬鹿鳴四牡皇華棠棣之歌伐木採
薇出車杖杜之讌皆詠志摘藻廣命群臣上與
日月爭光下與鍾石比韻事同觀海義等窺天
觀之而不測遊之而不知者矣竊惟左史記言
右史記事君舉必書無論大小况乎感而後思
思而後積積而後滿滿而後言若斯而已哉謹
因事立名隨源編次